



Rekursu Prevensaun Programa Nabilan Nian

FOLLA INFORMATIVA 2. TEORIA KONA-BA MUDANSA HODI PREVE NE VIOLÉNSIA HASORU FETO

Atualizadu Dezembru 2016

Violénsia hasoru fetu sai nu'udar asuntu sosiál kompleksu no iha fatór barak ne'ebé kontribui ba violénsia ne'e. Nune'e sai importante liután atu fó tempu natoon atu hanoin kona-ba oinsá ita dezenvolve programa no iniciativa sira hodi prevene violénsia hasoru fetu. Teoria ezistente kona-ba oinsá ema bele halo mudansa ba situasaun ka rezolve problema ruma (teoria kona-ba mudansa) bele sai hanesan instrumentu útil tebes hodi tulun dezenvolve asaun ne'ebé ita-nia projetu sira presiza.

Organizasaun prevensaun Australianu *Our Watch* define teoria mudansa hanesan:

"...dalan oinsá atu la'o tuir asaun ne'ebé presiza halo hodi hamosu transformasaun (mudansa) sosiál kompleksu no longu-prazu, no prinsípiu ka presupostu sira iha asaun hirak-ne'e nia kotuk." (*Our Watch* 2014).

Teoria no prinsípiu sira kona-ba mudansa ne'ebé hatudu hanesan útil no efetivu ba prevensaun violénsia hasoru fetu inklui:

- Modelu Ekolójiku
- Proschaka no Velicer sira-nia Teoria kona-ba Faze Mudansa sira
- Teoria Norma Sosiál

Iha kontestu violénsia hasoru fetu sai mós importante atu rekoñese katak teoria hirak-ne'e hetan ona influénsia liuhosi teoria feminista, ne'ebé valoriza feminizmu nia kontribuisaun hodi rekoñese katak violénsia hasoru fetu mak asuntu saúde globál no atu advoga ba resposta justisa no prevensaun.

Teoria hirak-ne'e mós hetan influénsia liuhosi enkuadramentu Direitus Umanus tanba violénsia hasoru fetu mak konsidera hanesan violasaun hasoru direitus umanus jeneralizadu liu hotu ne'ebé afeita fetu sira hosi idade, rasa, kultura no rikeza hotu hotu, no afeita barak liu fetu sira hosi comunidade indijena no marjinalizadu (hanesan fetu sira ho defisiénsia no fetu LGBTI sira).

Uza Modelu Ekolójiku hodi komprende violénsia hasoru fetu

Lori Heise dezenvolve Modelu Ekolójiku (Figura 1) iha tinan 1998 hodi apresenta kontestu klaru kona-ba oinsá violénsia hasoru fetu mosu hela iha ita-hotu nia sosiedade sira tomak. Enkuadramentu ida-ne'e rekoñese katak la'ós fatór ida-de'it mak kauza violénsia hasoru fetu no katak violénsia mosu tanba interasaun entre fatór individuál, familia, comunidade, no sosio-kulturál sira – ne'ebé mak reprezenta liuhosi nivel oioin iha Modelu Ekolójiku. Nune'e, Modelu Ekolójiku sei tulun ita atu hetan komprensaun kle'an liután kona-ba asuntu violénsia hasoru fetu. Porezemplu, liuhosi uza Modelu Ekolójiku, ita bele haree tanbasá atu hatete de'it ba mane individuál atu la uza violénsia hasoru fetu sei la hapara nia hahalok se karik nia família no belun sira kontinua atu apoia uzu violénsia, se karik norma sosiál ne'ebé justifika mane sira-nia domíniu hasoru fetu laiha mudansa, no se karik lei sira hodi kastigu violénsia hasoru fetu la hetan implementasaun loos.

Uza Modelu Ekolójiku nu'udar modelu ba mudansa

Aleinde tulun ita komprende problema violénsia hasoru fetu, Modelu Ekolójiku bele mós tulun ita atu hetan solusaun prevensaun violénsia efetivu liu hotu. Heise (2015) no Revista Lancet (2014) uza Modelu Ekolójiku atu ilustra buat ne'ebé presiza iha nivel hotu hotu hodi ezije no fó dalan ba mudansa pozitivu. Modelu Ekolójiku bele uza ba ita atu refleto kona-ba se karik ita-nia programa prevensaun violénsia mak efetivu, no atu másimiza sira nia impaktu .



Figura 1: Modelu Ekolójiku. Fonte: Michau et al 2014

Uza Modelu Ekolójiku atu identifika sé mak ita tenke serbisu hamutuk

Modelu Ekolójiku mós sai importante ba programa, projetu no inisiativa sira hodi hametin katak sira envolve comunidade tomak. Iha aprosimasaun SASA!,¹ ida-ne'e mak hanaran 'Sirkulu Influénsia' (haree iha kraik), no ida-ne'e rekoñese katak sirkulu ida-ida halo influénsia ba ema ida-nia esperiénsia no ideia kona-ba violénsia. Ita tenke envolve ema hosi sirkulu influénsia hotu hotu iha atividade prevensaun tanba, selae, ita sei la hetan susesu hodi muda norma komunitária ne'ebé sustenta violénsia hasoru feto no labarik.



Figura 2: Uza Modelu Ekolójiku atu identifika sirkulu influénsia. Fonte: Raising Voices, 2008.

¹ Aprosimasaun SASA! nian dezenvolve husi organizaun Raising Voices iha Uganda. Atu hatene informasaun liután kona-ba sira-nia rekursus relasiona ho prevensaun violénsia, vizíta ba: <http://raisingvoices.org/sasa/>

Proschaka no Velicer sira-nia Modelu Faze Públiku ba Mudansa

Proschaka no Velicer sira-nia Modelu Faze Mudansa nian esplika faze mudansa ne'ebé ema la'ó tuir bainhira sira serbisu hodi muda sira-nia hahalok no prátika. Ida-ne'e bele útil ba mudansa transformasionál individuál no koleтиву (hanesan, eskolár tomak) (Kyegombe, 2014; Michau 2007).

Faze 1: Pre-kontemplasaun: individuál la hatene kona-ba problema no nia konsekuénsia ba nia moris.

Faze 2: Kontemplasaun: individuál ida hahú atu hanoin kona-ba se karik problema iha relasaun ho nia moris.

Faze 3: Preparasaun ba asaun: individuál ida sei hetan informasaun liután no dezenvolve intensaun atu halo asaun.

Faze 4: Asaun: individuál ida hahú koko dalan foun no diferente ba nia hanoin no hahalok.

Faze 5: Manutensaun: individuál rekoñese ona benefísiu hosi mudansa ba hahalok no mantén hela mudansa ne'e.

SASA! (*Raising Voices*, 2008) mak nu'udar ezemplu kona-ba oinsá teoria mudansa ne'e bele utiliza hanesan modelu ba mudansa iha comunidade nia laran, uza tipu podér oioin. Iha SASA! faze 'Hahú' mak korresponde ho **pre-kontemplasaun**, faze 'Konxiénsia' korresponde ho **kontemplasaun**, faze 'Apoiu' korresponde ho **preparasaun ba asaun**, no faze 'Asaun' korresponde ho **asaun** nomós **manutensaun**.

Faze iha mudansa individuál	Faze SASA! sira	Tipu podér
Pre-kontemplasaun	Hahú: <ul style="list-style-type: none"> Aprende kona-ba comunidade nia fiar no atitude kona-ba violénsia hasoru feto. Seleciona membru comunidade sira atu sai Ativista Komunitade nian. Reflesaun kona-ba Ita-nia kbiit ka podér rasik. 	Rekoñese podér iha Ita-nia an. Podér ka kbiit iha laran mak forsa ne'ebé mosu iha ita-nia laran bainhira ita rekoñese abuzu podér no ita nia podér rasik atu hahú prosesu mudansa pozitivu.
Kontemplasaun	Konxiénsia: <ul style="list-style-type: none"> Aumenta comunidade nia konxiénsia kona-ba violénsia hasoru feto no labarik, tanbasá nia mosu no saida mak nia konsekuénsia. Enkoraja hanoin kriticu. 	Komprende mane sira-nia utilizaun podér hasoru feto sira. Podér hasoru mak podér ne'ebé ema ida mak uza atu kontrola ema ka grupu seluk. Atu uza Ita-nia podér hasoru ema seluk mak injustisa. Atu kria igualdade podér entre feto no mane sei fó benefísiu ba ema hotu hotu.
Preparasaun ba asaun	Apoio: <ul style="list-style-type: none"> Enkoraja membru oioin iha comunidade atu serbisu hamutuk no apoia malu. Harii hela rede sira. Reforsa kapasidade sira hodi hamosu mudansa. 	Tau podér koleтиву ho ema seluk atu fó apoiu. Podér hamutuk ho mak podér ne'ebé sente bainhira ema rua ka liután mai hamutuk hodi halo buat ruma ne'ebé sira mesak labele halo. Podér hamutuk ho sei inklui fó apoiu ba ema ne'ebé hasoru nesesidade, ema ne'ebé koko halo mudansa no ema ne'ebé ko'alia fó-sai. Podér hamutuk ho mós inklui husu tulun no apoiu.
Asaun & Manutensaun	Asaun: <ul style="list-style-type: none"> Foti asaun atu hamosu mudansa pozitivu. Koko hahalok foun. Selebra mudansa. Haforte asaun sira hodi hametin sustentabilidade. 	Uza ita-nia podér atu kria mudansa pozitivu. Podér atu mak fiar, enerjia no asaun ne'ebé individuál no grupu sira uza atu kria mudansa. Podér atu mak liberdade ne'ebé feto no mane sira esperiénsia bainhira sira sai livre atu realiza sira-nia potensial tomak, la kesi hela liuhosi norma ne'ebé aseita de'it mane sira-nia podér hasoru feto sira.

Norma Sosiál sira

Modelu Ekolójiku ne'ebé hatudu iha leten haklakan hela knaar importante ne'ebé norma sosiál sira halo iha nivel hotu hotu hodi hapara violénsia hasoru feto. Iha komponente importante tolu atu bele komprende norma sosiál sira (Alexander-Scott et al. 2016):

1 Norma sosiál sira mak fiar komún kona-ba:

- Buat ne'ebé ema seluk iha grupu **halo iha realidade** (hanesan katak, saida mak hahalok baibain)
- Saida mak ema seluk iha grupu hanoin katak ema seluk **tenke halo** (hanesan katak, saida mak hahalok apropiadu)

2 Norma sosiál sira eziste iha grupu referénsia sira-nia laran: grupu referénsia mak grupu ema importante ba individuál bainhira nia halo desizaun ruma (hanesan katak, inan-aman, maun-alin, maluk-eskola, kolega-serbisu, kolega-jogadór, belun sira iha Facebook). Grupú referénsia bele hela besik individuál ka dook.

3 Norma sosiál tenke mantén hela, iha parte, liuhosi aprovasaun ka dezaprovasaun iha grupu referénsia nia laran: Individuál sira ne'ebé viola norma sira iha grupu referénsia bele hasoru kastigu hosi grupu, no sira-ne'ebé kumpre tuir bele hetan benefísiu ka aprovasaun. Ita-nia hakarak atu konforme tuir espetativa hosi grupu referénsia signifika katak norma sosiál sira bele iha impaktu boot ba ema-nia hahalok no bele forte liu proibisaun legál sira. Porezemplu, mane barak uza nafatin violénsia hasoru feto, maski ohin-loron iha ona lei sira kontra ida-ne'e. Razaun prinsipál ba ida-ne'e mak katak mane hirak-ne'e nia belun, membru família, ka kolega sira (sira-nia grupu referénsia) aprova sira-nia hahalok violénsia hanesan buat normál no aseitavel, no bele fó benefísiu ba mane hirak ne'e ho naran 'mane tebes' tanba sira hatudu hahalok forte no dominante. Maibé, se karik belun, membru família no kolega sira komesa promove ativamente relasaun la'ós-violentu, mane sira-ne'e barak sei iha probabilidade atu hapara uza violénsia hasoru feto atu nune'e sira-nia grupu referénsia sei simu sira.

Importante atu nota katak se karik iniciativa prevensaun violénsia foka de'it ba buat ne'ebé ema halo iha realidade (hanesan katak, estatística kona-ba violénsia hasoru feto) nune'e ida-ne'e bele laho intensaun hasa'e frekuénsia hahalok violentu tanba ema ne'ebé laiha lala'ok hanesan ne'e uluk bele hahú atu uza violénsia hodi aliña sira-nia hahalok ho buat ne'ebé sira hanoin maioria ema sira halo (Neville 2015). Nune'e, sai importante ba iniciativa prevensaun violénsia atu enkoraja comunidade sira atu foka ba vizaun pozitivu ba mudansa. Iniciativa prevensaun violénsia efetivu bele apoia grupu referénsia sira atu normaliza relasaun respeitozu no livre hosi violénsia.

Atu hatene informasaun liután kona-ba Rekursu Prevensaun ne'e, kontaktu ba:

Xian Warner | Koordinadór Prevensaun, Programa Nabilan: Hapara Violénsia hasoru Feto
Fundasaun Ázia | Xian.warner@asiafoundation.org | +670 331-3457